

თვითმმართველი ქალაქის - ბათუმის საკრებულო
განკარგულება №19

2011 წლის 31 იანვარი, ქალაქი ბათუმი

შეზღუდული პასუხისმგებლობის საზოგადოება –
„სარაგბო კლუბი ბათუმის“ წესდების დამტკიცების შესახებ

„ადგილობრივი თვითმმართველობის შესახებ“ საქართველოს ორგანული კანონისა და „მეწარმეთა შესახებ“ საქართველოს კანონის შესაბამისად, თვითმმართველი ქალაქის - ბათუმის საკრებულომ გადაწყვიტა:

1. დამტკიცდეს შეზღუდული პასუხისმგებლობის საზოგადოება – „სარაგბო კლუბი ბათუმის“ თანდართული წესდება.

2. განკარგულება ძალაშია ხელმოწერისთანავე.

საკრებულოს თავმჯდომარე
გიორგი კირთაძე

„ დ ა მ ტ კ ი ც ე ბ უ ლ ი ა ”
თვითმმართველი ქალაქის - ბათუმის
საკრებულოს განკარგულება
2011 წლის 31 იანვარი №19

შეზღუდული პასუხისმგებლობის საზოგადოება
„სარაგბო კლუბი ბათუმის“

წ ე ს დ ე ბ ა

მუხლი 1. ზოგადი დებულებები

1. შეზღუდული პასუხისმგებლობის საზოგადოება „სარაგბო კლუბი ბათუმის“ (შემდგომში საზოგადოებად წოდებული) შექმნილია „მეწარმეთა შესახებ“ საქართველოს კანონის შესაბამისად.
2. საზოგადოება იქმნება განუსაზღვრელი ვადით.
3. საზოგადოების სამეურნეო წელი ემთხვევა კალენდარულ წელს. დრო საზოგადოების რეგისტრაციიდან რეგისტრაციის წლის 31 დეკემბრამდე შეადგენს ერთ ნაკლებ სამეურნეო წელს.

მუხლი 2. საზოგადოების სრული და შემოკლებული სახელწოდება

1. საზოგადოების სრული სახელწოდებაა: შეზღუდული პასუხისმგებლობის საზოგადოება „სარაგბო კლუბი ბათუმი“.
2. საზოგადოების შემოკლებული სახელწოდებაა: შპს „სარაგბო კლუბი ბათუმი“.

მუხლი 3. საზოგადოების იურიდიული მისამართი და სტატუსი

1. საზოგადოების იურიდიული მისამართია: საქართველო, ქ. ბათუმი, ლუკა ასათიანის ქ. №25.
2. საზოგადოება არის იურიდიული პირი, რომელიც ფუნქციონირებს საქართველოს მოქმედი კანონმდებლობით და წინამდებარე წესდების შესაბამისად.
3. საზოგადოება იურიდიული პირის უფლებებს და მოვალეობებს იძენს დადგენილი წესით რეგისტრაციის დღიდან.

მუხლი 4. საზოგადოების საქმიანობის საგანი

1. საზოგადოების ძირითადი საქმიანობის საგანია:
 - ა) კვალიფიცირებული რაგბისტების მომზადება;
 - ბ) რაგბისტების გაერთიანება საკლუბო საწყისეზზე, მათი პროფესიული ინტერესების დაცვა, ჩემპიონატებში მონაწილეობის მიღება;
 - გ) რაგბის პოპულარიზაცია;

დ) ბავშვთა და მოზარდთა რაგბის განვითარება, საერთაშორისო კლასის რაგბისტებისა და გუნდების მომზადებისათვის, ასევე მოყვარულთათვის ფიზკულტურასა და სპორტში მეცადინეობისათვის ხელშეწყობის მიზნით მატერიალურ-ტექნიკური ბაზის შექმნა, პროფესიონალ რაგბისტთა გუნდებისათვის ღირსეული ცვლის მომზადება;

ე) სპორტული ღონისძიებების შემუშავება, ორგანიზება;

ვ) სპორტსმენთა მომზადების ორგანიზაციული და მეთოდური ხელმძღვანელობა, ფიზკულტურულ-განმაჯანსაღებელი სამუშაოების განხორციელება;

ზ) კავშირების დამყარება საქართველოს სხვა რეგიონებისა და სხვა ქვეყნების სარაგბო კლუბებთან, სხვადასხვა რანგის შეჯიბრებებსა და ჩემპიონატებში მონაწილეობა.

2. საქმიანობას, რომლის განსახორციელებლად საქართველოს კანონმდებლობა ითვალისწინებს სპეციალურ ნებართვას (ლიცენზირება, სერთიფიცირება), საზოგადოება წარმართავს საქართველოს კანონმდებლობით დადგენილი წესით სათანადო ნებართვის (ლიცენზიის) მიღების შემდეგ.

მუხლი 5. საზოგადოების პარტნიორები

საზოგადოების პარტნიორი არის: საზოგადოების საწესდებო კაპიტალში 100%-ანი წილის მესაკუთრე – თვითმმართველი ქალაქი ბათუმი, წარმოდგენილი თვითმმართველი ქალაქის – ბათუმის საკრებულოს სახით (მის: ქ. ბათუმი, ლ. ასათიანის ქ. №25, საინდენტიფიკაციო კოდი: 245576005).

მუხლი 6. პარტნიორთა კრება

1. საზოგადოების მართვის უმაღლესი ორგანოა პარტნიორთა კრება, რომელიც წარმართავს საზოგადოების საქმიანობას.

2. პარტნიორთა კრება იღებს გადაწყვეტილებას ყველა საკითხზე. კერძოდ:

ა) საზოგადოების წესდების დამტკიცება, მასში ცვლილებებისა და დამატებების შეტანა;

ბ) პარტნიორის მიერ წილის გასხვისება მესამე პირებზე, რომლის შესახებ გაცემულ ნებართვაში მითითებული უნდა იქნას შემძენის პიროვნება;

გ) სამეურნეო პოლიტიკის ზოგადი პრინციპების განსაზღვრა;

დ) ფილიალების შექმნა და ლიკვიდაცია;

ე) უძრავი ქონების შეძენა, გასხვისება და დატვირთვა;

ვ) ხელმძღვანელ მუშაკთათვის მოგებისა და საერთო შემოსავალში მონაწილეობისა და პენსიის მიცემის პრინციპების განსაზღვრა;

ზ) დირექტორის დანიშვნა და გამოწვევა, მასთან შრომის ხელშეკრულებების დადება და შეწყვეტა, აგრეთვე მისი ანგარიშის დამტკიცება;

თ) წლიური შედეგების დამტკიცება და შედეგების გამოყენება;

ი) პროკურის გაცემა და გაუქმება;

კ) აგრეთვე სხვა საკითხები, რომლებიც სცილდება საზოგადოების ჩვეულებრივი საქმიანობის ფარგლებს ან/და რომლებზეც პარტნიორთა კრება დაადგენს პარტნიორთა კრების გზით გადაწყვეტილების მიღების აუცილებლობას.

მუხლი 7. დირექტორი

1. საზოგადოების ხელმძღვანელობა და წარმომადგენლობა ეკისრება დირექტორს, რომელსაც თანამდებობაზე მიშნავს და თანამდებობიდან ათავისუფლებს ქ. ბათუმის საკრებულო საკრებულოს ბიუროს წარდგინებით.

2. ხელმძღვანელობით საქმიანობად მიიჩნევა მოქმედება, რომელიც პირდაპირ ან არაპირდაპირ ემსახურება საზოგადოების მიზანს.

3. დირექტორი წარმოადგენს საზოგადოებას მესამე პირებთან სამართლებრივ ურთიერთობაში. ის მოქმედებს ერთპიროვნულად და მისი წარმომადგენლობითი უფლებამოსილება მესამე პირთან ურთიერთობაში არ არის შეზღუდული, გარდა საქართველოს კანონმდებლობით ან/და წინამდებარე წესდებით გათვალისწინებული შემთხვევებისა.

4. დირექტორს არ აქვს უფლება პარტნიორის თანხმობის გარეშე მისდიოს იმავე საქმიანობას, რასაც მისდევს საზოგადოება ან მიიღოს მონაწილეობა მსგავსი ტიპის სხვა საზოგადოებაში პერსონალურად პასუხისმგებელი პარტნიორის ან დირექტორის სახით. ამ თანხმობის გაცემა შეუძლია პარტნიორთა კრებას. ასეთ საქმიანობაზე თანხმობა მიცემულად ჩაითვლება, თუ საზოგადოების ხელმძღვანელად დანიშვნისას პარტნიორისათვის ცნობილი იყო, რომ საზოგადოების ხელმძღვანელი ეწევა ასეთ საქმიანობას და ამ საქმიანობის შეწყვეტა მისთვის აშკარად არ მოუთხოვიათ.

5. დირექტორი საზოგადოების საქმეებს უნდა გაუძღვეს კეთილსინდისიერად. თუ ის არ შეასრულებს ამ მოვალეობას, წარმოშობილი ზიანისათვის პასუხს აგებს პარტნიორის წინაშე, თუ ვერ დაამტკიცებს, რომ მას არ დაურღვევია თავისი მოვალეობა.

6. დირექტორი პასუხისმგებელია იმაზე, რომ საზოგადოების საბუღალტრო საქმეები და აღრიცხვა წარმოებდეს საქართველოში მოქმედი საბუღალტრო აღრიცხვისა და ანგარიშგების კანონმდებლობის შესაბამისად.

7. დირექტორი ვალდებულია ათი წლის განმავლობაში შეინახოს კანონით გათვალისწინებული ყველა დოკუმენტი საზოგადოების საქმიანობაზე.

8. სამეურნეო წლის პირველი თვის განმავლობაში დირექტორმა უნდა შეადგინოს გასული სამეურნეო წლის წლიური ბალანსი, ანგარიში მოგება-ზარალის შესახებ (წლიური ანგარიში), ასევე საქმიანობის ანგარიში და უნდა წარუდგინოს დამფუძნებელს.

9. დირექტორი უფლებამოსილია:

- ა) დაამტკიცოს საზოგადოების დოკუმენტები და საშტატო განრიგი;
- ბ) მიიღოს და გაათავისუფლოს სამუშაოდან საზოგადოების მუშაკები;
- გ) წახალისოს და დისციპლინური პასუხისმგებლობა თანამშრომელთა მიმართ შინაგანაწესისა და მოქმედი კანონმდებლობის შესაბამისად;
- დ) დადოს გარიგებები და გასცეს მინდობილობები იმ საკითხებზე, რაც შედის მის უფლებამოსილებებში;

- ე) გახსნას ანგარიშები;
- ვ) გამოსცეს საორგანიზაციო-განმკარგულებელი ხასიათის დოკუმენტები;
- ზ) გადაწყვიტოს კანონმდებლობით და საზოგადოების წესდებით გათვალისწინებული სხვა სახის საკითხები.

მუხლი 8. დირექტორის დროებით მოვალეობის შემსრულებლის განსაზღვრა

საზოგადოების დირექტორის მიერ თავისი უფლებამოსილების განხორციელების შეუძლებლობის (დროებითი შრომისუუნარობის გამო) ან სხვა საფუძვლის არსებობისას დირექტორისათვის შრომითი ურთიერთობის დროებით შეჩერების დროს ამავე საზოგადოების თანამშრომელთაგან დირექტორის დროებით მოვალეობის შემსრულებლის განსაზღვრის შესახებ გადაწყვეტილებას ღებულობს ქ. ბათუმის საკრებულოს თავმჯდომარე ქ. ბათუმის საკრებულოს ბიუროს წარდგინებით.

მუხლი 9. წლიური შედეგები

1. პარტნიორს აქვს წლიური გაუნაწილებელი მოგების მიღების უფლება ნაშთის ჩათვლით და ზარალის გამოკლებით.
2. შედეგების გამოყენების შესახებ გადაწყვეტილების მიღებისას პარტნიორს შეუძლია თანხა მოგებიდან ანარიცხებში ჩარიცხოს ან წარმოადგინოს როგორც მოგება.

მუხლი 10. საზოგადოების საქმიანობის შეწყვეტა

1. საზოგადოება წყვეტს საქმიანობას:
 - ა) პარტნიორთა კრების გადაწყვეტილებით;
 - ბ) კანონით გათვალისწინებულ სხვა შემთხვევებში.
2. საზოგადოების საქმიანობის შეწყვეტა ხდება მისი რეორგანიზაციის (შერწყმის, შეერთების, გაყოფის, გარდაქმნის) ან ლიკვიდაციის გზით.
3. საზოგადოების რეორგანიზაციის შემთხვევაში მისი ყველა უფლება და ვალდებულება გადაეცემა მის უფლებამონაცვლეს.
4. ლიკვიდაცია ხორციელდება მოქმედი კანონმდებლობით დადგენილი წესით.



ქალაქ ბათუმის მუნიციპალიტეტის მერი

ქ. ბათუმი

20/11/2017

2077-25-4-201711201301



ბ რ ძ ა ნ ე ბ ა N 2077

შეზღუდული პასუხისმგებლობის საზოგადოება „სარაგბო კლუბი ბათუმი“-ს წესდებაში ცვლილების შეტანის თაობაზე

საქართველოს ორგანული კანონის „ადგილობრივი თვითმმართველობის კოდექსი“ 106¹ მუხლის მე-5 პუნქტის შესაბამისად,

ვ ბ რ ძ ა ნ ე ბ ა :

1. შეზღუდული პასუხისმგებლობის საზოგადოება „სარაგბო კლუბი ბათუმი“-ს (ს/კ №445393495) წესდების (დამტკიცებული თვითმმართველი ქალაქის - ბათუმის საკრებულოს 2011 წლის 31 იანვრის №19 განკარგულებით) მე-7 მუხლის პირველი პუნქტი ჩამოყალიბდეს შემდეგი რედაქციით:

„1. საზოგადოების ხელმძღვანელობა და წარმომადგენლობა ეკისრება დირექტორს, რომელსაც თანამდებობაზე ნიშნავს და თანამდებობიდან ათავისუფლებს ქ. ბათუმის მუნიციპალიტეტის მერი.“

2. შეზღუდული პასუხისმგებლობის საზოგადოება „სარაგბო კლუბი ბათუმი“-ს (ს/კ №445393495) წესდების მე-7 მუხლს დაემატოს შემდეგი შინაარსის 1¹; 1²; 8¹; 8² და 8³ პუნქტები:

„1¹. დირექტორი თანამდებობაზე ინიშნება ერთი სამეურნეო წლის ვადით, რომელიც მოიცავს წლის დასაწყისიდან - 1 იანვრიდან წლის დასასრულამდე - 31 დეკემბრის ჩათვლით პერიოდს (კალენდარული წელი).“

1². ქ. ბათუმის მუნიციპალიტეტის მერი (პარტნიორთა კრება) უფლებამოსილია ვადაზე ადრე გაათავისუფლოს დირექტორი დაკავებული თანამდებობიდან ან გაუგრძელოს უფლებამოსილების ვადა ერთი სამეურნეო წლით.

8¹. დირექტორს უფლება არ აქვს გამოიტანოს ნაღდი ფული საზოგადოების საბანკო ანგარიშ(ებ)იდან.

8². დირექტორს უფლება არ აქვს საბანკო ოპერაციები (გადარიცხვები) აწარმოოს მთავარი ბუღალტერის ავტორიზაციის გარეშე. თუ საზოგადოებას არ ჰყავს მთავარი ბუღალტერი, მაშინ აღნიშნულ უფლებამოსილებას დირექტორთან ერ-

თად ახორციელებს თანამშრომელი, რომელიც თანამდებობრივად პასუხისმგებელია საბუღალტრო აღრიცხვაზე.


8³. დირექტორი ვალდებულია ყოველთვიურად (პირველ დეკადაში) დამფუძნებელ პარტნიორს წარუდგინოს ამონაწერ(ებ)ი საწარმოს საბანკო ანგარიშ(ებ)იდან მიმდინარე თვის პირველი რიცხვის მდგომარეობით.“.

3. წინამდებარე ბრძანებით შეზღუდული პასუხისმგებლობის საზოგადოება „სარაგბო კლუბი ბათუმი“-ს წესდებაში განხორციელებული ცვლილება ვრცელდება ასევე ამ ცვლილების ამოქმედებამდე დანიშნულ დირექტორზეც, რაც ნიშნავს, რომ მოქმედი დირექტორის უფლებამოსილების ვადაა 2017 წლის 31 დეკემბრის ჩათვლით პერიოდი.

4. ქ. ბათუმის მუნიციპალიტეტის მერიის აპარატის იურიდიული განყოფილების უფროსს (ვახტანგ გედენიძე, პირადი ნომერი: 61001051657) დაევალოს წინამდებარე ბრძანებით განხორციელებული ცვლილების შესაბამისად კანონმდებლობით გათვალისწინებული ღონისძიებების განხორციელება.

5. ბრძანება ძალაშია ხელმოწერისთანავე.

ლაშა კომახიძე



ქ. ბათუმის მუნიციპალიტეტის მერი